

COMUNICÂT STAMPE

PAR CURE DE ARLEF TAL INSERT "SGULP!" DAL MESSAGGERO

VUÊ IN EDICULE "CIRIBIRIBIN", LA GNOVE PAGJINE FURLANE PAR FRUTS

Udin, ai 24 di Setembar 2013 – Al è jessût vuê in edicule il prin numar di "Ciribiribin", la gnove pagjine di plante fûr in lenghe furlane curade de ARLeF - Agenzie regionâl pe lenghe furlane dentri dal insert par fruts "SGULP!" dal quotidian Messaggero Veneto. Lei zuiant e zuiâ leint al è un dai mûts plui bogns par imbastî la prime cognossince di une lenghe: al è par chest che ARLeF e à decidût di colaborâ al gnûf insert cuntune pagjine che e jessarà ducj i martars, compagnant i piçui letôrs fintremai ae fin dal an scolastic.

"La jessude e cole propit te setemane indulà che si celebre la Zornade europeane des lenghis e no je maniere miôr par festezâ cheste ricorence, istituide par ricuardâ trop che al è impuartant mantignî vivis lis lenghis. Lis ultimis ricercjis internazionâls a confermin i beneficis dal plurilinguism: la inteligence, la capacitât di aprediment, la viertidure ae diversitât", al spiege William Cisilino, diretôr de ARLeF.

Propit par chest e je proviodude ancje la distribuzion gratis di cualchi copie ai referents dal insegnament de lenghe furlane tes scuclis primariis dal territori indulà che si fevele furlan, daûr dal model dal progjet "Quotidiano in classe". "La pagjine in marilenghe e podarà cussì diventâ un strument didatic util par insegnants e gjenitôrs – al zonte Cisilino - e e sarà une pagjine vierte ai contribûts dai fruts, che cussì si esercitaran ancje te scritture divertintsi".

A chest proposit te pagjine, ideade e curade di Elisabetta Pozzetto, e cjatarà spazi la rubriche "Rispuint come Proust", une version par furlan dal innomenât cuistionari che e permetarà ai fruts di partecipâ e fâsi cognossi. I volenterôs che a rispuindaran aes domandis sul model che si pues discjariâ dal sît www.arlef.it e che a vignaran publicâts a ricevaran in omaç il dvd dai cartons animâts de "Pimpa par furlan".